

Na osnovu člana 35., stav 2. i člana 51. stav 3.. Zakona o zaštiti prirode ("Službene novine Federacije BiH, broj 33/03), federalni ministar prostornog uređenja i okoliša donosi

PRAVILNIK

O USPOSTAVLJANJU SISTEMA PRAĆENJA NAMJERNOG DRŽANJA I UBIJANJA ZAŠTIĆENIH ŽIVOTINJA

Član 1.

Ovim pravilnikom uređuje se uspostavljanje sistema praćenja namjernog držanja i ubijanja zaštićenih životinja, te organizovanje i rad stručne službe koju su osobe navedene u stavu 2. ovog člana dužne imati za obavljanje poslova provođenja navedenog sistema.

Pravne osobe koje su dužne imati stručne službe za obavljanje poslova praćenja namjernog držanja i ubijanja zaštićenih životinja, u smislu odredaba ovog pravilnika, su lovačka društva, ribolovna društva, zoološki vrtovi, naučne i naučnoistraživačke institucije, nevladine organizacije i druge pravne osobe koje se bave biotaksonomskim i idioekološkim istraživanjima.

Član 2 .

Pod stručnom službom, iz člana 1. ovog pravilnika, podrazumijeva se jedan ili više stručnih izvršilaca za provođenje praćenja namjernog držanja i ubijanja zaštićenih životinja (u daljnjem tekstu: stručna služba).

Član 3.

Potreban broj stručnih izvršilaca određuje osoba iz člana 1. stav 2. ovog pravilnika ovisno o:

- 1) stručnoj podobnosti stručnog izvršioca,
- 2) površini koja se kontroliše,
- 3) broju i raznolikosti zaštićenih vrsta,
- 4) veličini i etološkoj kompleksnosti pripadajućih individua,
- 5) vrsti i konfiguraciji terena koji se kontroliše.

Član 4.

Za stručnog izvršioca može se angažovati lice sa visokom, iznimno višom stručnom spremom, i to sa onih visokoškolskih ustanova koje tokom edukacije daju primarno obrazovanje iz: biosistematike i ekologije životinja.

Član 5.

Stručna služba organizira, obavlja i nadzire sve stručne radnje i poslove praćenja namjernog držanja i ubijanja zaštićenih životinja, odnosno vrši nadzor:

- 1) staništa životinja,
- 2) lovnotehničkih i lovnogospodarskih objekata,
- 3) upotrebe lovačkih pasa, lovačkog oružja i naboja,
- 4) primjeni lovne etike,
- 5) štetama prouzrokovanim od strane zaštićenih životinja,
- 6) prihrane i prehrane životinja,
- 7) zdravstvenog stanja životinja,
- 8) poslovne dokumentacije i
- 9) analize stanja na kontrolisanom području,

Član 6.

Stručna služba u provođenju praćenja namjernog držanja i ubijanja zaštićenih životinja obavlja naročito slijedeće poslove:

- 1) nadzire i prati stanje na teritoriju koji se kontroliše:
 - brojno stanje zaštićenih vrsta te spolnu i dobnu strukturu njihovih populacija,
 - dnevne i sezonske migracije životinja,
 - zdravstveno stanje životinja;
 - uslove za razmnožavanje životinja i odgajanje mladunčadi, broj rasplodnih ženki i njihovih mladunčadi te ostvaren prirast po vrstama,
 - prihranu i prehranu životinja,
 - stanje postojećih objekata,
 - način lova životinja te upotrebu opreme, lovačkih pasa, lovačkog oružja i naboja, kao i lov pticama grabljivicama,
 - označavanje granica prostora koji se kontroliše,
 - provođenje eventualnih znanstveno-istraživačkih radova;

- 2) organizira sve potrebne radove na provođenju zaštite životinja:
 - otkrivanje, praćenje i prebrojavanje ugroženih i zaštićenih životinja,
 - održavanje broja individua u populacijama zaštićenih životinja,
 - ocjenjivanje stepena ugroženosti životinja koje nisu na spisku zaštićenih vrsta,
 - provođenje preventivnih mjera zaštite životinja pri obavljanju poljoprivrednih i drugih radova na teritoriju koji se kontroliše,
 - provođenje preventivnih higijensko-zdravstvenih mjera na teritoriju koji se kontroliše radi zdravstvene zaštite životinjskih vrsta,
 - na zahtjev pravne osobe iz člana 1. stav 2. ovog pravilnika organizira lovni turizam

3) izrađuje i obavlja sve potrebne i propisane analize, evidencije, korespondencije i izvještaje:

- elaborat brojenja i prebrojavanja zaštićenih životinja,
- štete od zaštićenih životinja i štete na populacijama zaštićenih životinja,
- plan lova zaštićenih životinja,
- plan prihrane i prehrane zaštićenih životinja,
- promet životinja,
- upotrebu opreme i životinja za lov individua pod zaštitom zakona,
- brojno stanje zaštićenih životinjskih vrsta;
- promjene na teritoriju koji se kontroliše i na njegovom dijelu koji predstavlja stanište određene zaštićene vrste,
- katastar teritorija koji se kontroliše,
- statistički izvještaji,
- ostali izvještaji za lice iz člana 1. stav 2. ovog pravilnika .

Član 7.

Stručna služba u provođenju praćenja namjernog držanja i ubijanja zaštićenih životinja saraduje sa organima i institucijama nadležnim za očuvanje biodiverziteta.

Podatke prikupljene praćenjem namjernog držanja i ubijanja zaštićenih životinja stručna služba jednom godišnje dostavlja informativnom sistemu za zaštitu prirode i vršenje monitoringa.

Član 8.

Nadzor nad provođenjem ovog pravilnika vrši kantonalni inspektor zaštite okoliša.

Izuzetno, ukoliko se praćenje namjernog držanja i ubijanja zaštićenih životinja obavlja u zaštićenom prirodnom području i nacionalnom parku, nadzor nad provođenjem ovog pravilnika vrši federalni inspektor zaštite prirode.

Član 9.

Pravne sobe iz člana 1. stav 2. ovog pravilnika dužne su uspostaviti stručnu službu u roku od šest mjeseci od dana stupanja na snagu ovoga pravilnika.

Član 10.

Ovaj pravilnik stupa na snagu osmog dana od dana objavljivanja u "Službenim novinama Federacije Bosne i Hercegovine".